

- 40 Nos hec legisse non est puto desipuisse:
 Pinximus in cribro, quod discit homo sine libro.
 Thebet, Plotinus, Theofrastus, Aratus, Eginus,
 Non michi neglecti, sed sunt pro tempore lecti,
 Nec latet hic fucus, quem fecit Arabs Humenucus.
- 45 Hic, mirum dictu, primo cadit arbor in ictu,
 Et vix erratur, si non secus introeatur.
 Jam modo vim quandam verbi pro tempore pandam.
 Astrea lex jussit, Jovis ut planeta tuus sit.
 Est Aries signum tibi, fixum, forte, benignum.
- 50 Esse domum Martis hic lege fatebimur artis.
 Sumunt verba fidem: Jovis est versatus ibidem,
 Qua tibi conlatus fuit hora pontificatus,
 Et directus erat, si quis verum retro querat.
 Nec deus absque dea, Jovis absque sua Citharea,
- 55 Tam certa sede Hammonis fulsit in ede.
 Aspectus leti veniunt de parte triceti,
 Lune crescentis ad dorsum Falcitenentis,
 Qui fugit exclusus, quia non bonus est suus usus.
 Sic de quadrato Sol spirat lumine grato,
- 60 Fortunatus et is aspectibus undique letis.
 Advertisse male sidus puto Mercuriale,
 Sed si triste venit, hoc retrogradatio lenit.
 De prope Mars residet et in auge velud pira stridet,
 Rexque tui signi privato deditus igni,
- 65 Nusquam combustus rutilo micat ore venustus.
 Preterea stabili potuit sedisse cubili,
 Cum si conpones certas horum rationes,
 Sint que figantur, sint sedes que moveantur.
 Optimus iste status et pulcre continuatus,
- 70 Quique suis mire valeat processibus ire,
 Sicut in Alcoaris libroque stat Albumazaris.
 Cui princeps Jovis est, huic sane plurima vis est,
 Famam qua pollet, sibi vix infamia tollet.
 Nec reor Ammonis signum parve rationis
- 75 Propter Mavortem, signi dominum bene fortem.
 Hec cui forma cadit, constanter in obvia vadit,
 Prestat virtute, raro nimis absque salute
 Vel sibi conatur, vel quidquam consiliatur.
 Est bene munificus et amicis fidus amicus,
- 80 Et nimis exosum tenet omne superciliosum.
 Non curat fastus, argutos prevenit astus,
 Militia gaudet, et supra quam satis audet,
 Et quos non Marte premit, illos subicit arte.
 Nimirum gratis sine sanguine vir probitatis
- 85 Ad proprios postes feriendo proterit hostes.
 Dapsilis est multum, raro variat sibi vultum.